

退

補

齋

文

存

退補齋文存目錄

卷六

永康胡鳳丹月樵

記

游暨陽鷺凸山記

桃溪垂釣圖記

辨先叔父春圃公遺骸記

紫藤仙館圖記

病中述病記

嚴師畏友記

記夢示宗廉宗彥兩兒

重修漢陽伯牙臺記

重修鄂垣正覺寺碑記

添修正覺寺書樓碑記

游暨陽鷺凸山記

壬子之春二月望後十日偕同契小杏澄溪步於蘭台之鷺凸山是日也颼風扇野嘉惠迎暘爰散步於青蕪綠草間燕語鶯啼助予逸興山下有西岳寺寺久圯供如來佛一尊傍塑昌黎公像蓋建造之初創於韓氏特塑像陪祀於其間也出寺門數武有鳥道一綫高欲侵雲而危險僅可容步且行且憩下視西岳寺隱現於溟濛煙霧中忽遠忽近峯回路轉露瓦屋十餘間視之登雲庵也將入庵春雨霏微三點兩點登其堂徘徊四望

未知為勝境也澄溪告余曰茲山之勝有泉有廟有潭有僧堂有平陽泉之水小而清廟之中幽而靜潭之泉淺而潔僧堂之內寂而閒平陽之地高而闊余曰盍往觀乎遂啟扉遊焉潺潺然聞瀑布聲瀉出於高峯之下者白沙泉也其水四時不竭掬水烹茶較武林虎跑泉為尤美自泉而往有廟廟有二區曰冰心曰百鍊鋼乾隆時為湯貞女所建也貞女生湯村歸趙氏未合卺而夫亡誓不他適晚年好靜居是庵晝夜誦經不稍輟歿後人立廟祀之循廟牆迤行六七步有潭大不過一溝

深不過三尺言有龍出沒唵嘯其中變化倏忽不可言  
狀遇歲旱里人禱雨輒應余曰嘻此區區之潭龍胡為  
潛其間哉豈龍之潛也不在大而在靜不在深而在潔  
歟遊龍潭既畢偕二子暫憩僧堂一僧出款客揖坐畢  
調水品茶色香味皆絕蓋潭中水也時則春光映麗淨  
域無塵嵐氣雲容一碧流盪登斯堂也宜鼓琴琴調和  
暢宜詠詩詩韻清絕俄而松濤四起有徵羽聲竹韻鏗  
鏘有金石聲皆茲堂之所助也少焉夕陽在山復遊於  
平陽之島島之前有山聳然而特立島之下有水窈然

而滌洄中視蘭台森然而遼迴俯仰左右山石之盤踞者如虎伏昂藏也村舍之連屬者如魚鱗稠疊也顧而樂之不知日之將暮二子屬余下山山徑崎嶇非復來遊時之路歸後憑几凝思遂援筆而為之記至茲山多未歷之境不能道其詳後之覽者覩縷以補之也可

鷺凸山村西小岫耳一經品題遂使巖瀑雲扉頓增聲色竊歎瞿曇寂寞空敲寒谷之鐘何圖康樂來遊借重春風之屐至行文歷落古峭淡宕猶夷勝讀鉅

鉅潭豐樂亭諸名記

趙綏庭

桃溪垂釣圖記

離永康城三十里許有桃溪吾宅在焉溪之中淵然而  
渚者為潭瀏然而激者為沼纏絡墟圃四時不涸可資  
厲揭者也溪之畔隆然而邈迤者為土隄蜿蜒捲龍卧其  
修百尋可捍潢潦者也隄內外鱗次而櫛比者為田上  
溪下溪畝以千計可藝禾麻者也隄之間蕭疎而上稍  
者為竹懷煙引霧其清可娛也溪之東蔥蘢而森列者  
為松萬本一色風來自濤其陰可蔭也循溪而西有平  
曠十畝許為桃園間桃而植者為李為梨為碧梧綠柳

其秀可餐其實可飽也百蔦桃為最盛故以名溪且援  
武陵例也吾族由龍山僑此十六世矣先祖酉山公增  
築土隄田廬益輦閭聯族萃稱樂土焉余自咸豐丙辰  
就宦京師每懷烏衣之游頗動鱸尊之興爰乞少齋貳  
尹圖之行將披綠蓑戴青笠與元真子為雲水交此卷  
其息壤也

桃花流水杳然去別有天地非人間有此妙境不可  
無此妙文讀之令人神往

張凱嵩

蕭散如遇幽人

林壽圖



辨先叔父春圃公遺骸記

嗚呼此真吾叔父之骨耶吾不得而知也此非吾叔父之骨耶吾亦不得而知也吾將何憑吾憑殉葬之物以辨之余至南陵父老咸相告曰此場也故塚累累計二百棺皆當時勇丁也欲辨真偽須徧地掘之而後可余曰嘻曩日忠骸雖非卜吉葬也吾掘之於心何安爰擇地立義塚將所檢之骨善瘞之然迄無蹤兆乃焚香帛而跪祝曰吾千里而來躋崇嶺之巔涉長江之險衝風冒雨不知勞也今叔父之骨猶未得豈天地之不容

耶豈祖宗之無靈耶豈兩子督兵有殘害於百姓耶豈子孫無福絕春秋之祭埽耶祝未畢俄見一老嫗貿貿然來詳言葬所隨其後而跡之果得枯骨內有朝珠墜係翠色獲其二余謝諸父老與老嫗曰此誠吾叔父之骨也吾心無疑也復覓獲全軀不禁悲喜交集曰此誠吾叔父之骨也生可對寡媳藐孤死可慰叔父於九泉下矣所檢翠色珠墜二攜歸告其孫為傳家不朽之寶以垂後世是為記

同治四年七月在南陵敬述

情感意哀聲淚俱下此所謂長歌當哭者

張凱嵩

紫藤仙館圖記

余自同治丙寅夏仲由皖來鄂理權務嗣兼書局初至時暫寓城西之都府隄屋小如舟不容旋馬每一入室局促如轅下駒後於城東得宅一區靈光歸然為劫火所未及有屋四十餘間園亭樓舍奧如曠如地名黃家巷入門而北為廳廳之外有廊繞廊而東小園在焉南則廣廈三楹軒窗四啓夏可以招涼冬可以納日舊題其額曰崇山疊翠今移廳檐下檐前藤花一架雙柯蔭碧屈曲如虬龍狀蓋百餘年物也余題其額曰紫藤仙

館屬郭君仙坡書之其前疊石為山或立或倚或俛或仰詭譎異狀嵌空玲瓏恍如靈鷲飛來別有境界穿石而西有小室焉額曰學書山房復折而西有園門一重顏之曰蓬門入門則庭宇修潔復有書屋明窗淨几雲破月來得幽深之趣厯階南上危亭一角亭前古藤一株枯而復生藤下芭蕉掩映綠滿窗櫺東接長廊有修竹百餘竿清陰可掬入一軒額曰坐中佳士又東行二十步許有亭翼然其下鑿地為池架石為梁清澈可鑑循廊稍北朱欄一曲拾級復上小樓巍然主人曰是仙

靈之所窟宅也樓下有井深數丈水淡而香四時不竭  
迤北一門入奇石當戶曲徑斜通有室二楹其一曰三  
聲草舍移置西廳上讀書聲紡織聲兒啼聲兼而有之  
東一楹舊有額曰床上書連屋余萃二十餘年所積之  
書藏弃其中庶幾名副其實矣乎園中花木頗繁果則  
枇杷石榴香櫟红柿花則紫薇黃梅桃李梅杏之屬此  
外古柏凌霄老槐臨水梧桐篩月叢桂留人復佐以珠  
蘭茉莉小品雜花盆甕羅列生意盎然四時流觀亦復  
粗備余自公退食棲息其中頗足樂也此園為前人種

瓜繫馬漸就荒蕪余此來為之冀除拂拭煥然改觀花  
神有知當不笑寓公之俗矣爰倩劉君半青為之圖袁  
君廉叔題圖額裝潢成軸並求諸名公題詠以誌雅賞  
云

敘次欽寄厯落深得柳州家法令讀者如入山陰道  
上應接不暇極輿如曠如之勝

張炳堃

柳子厚謫永州作諸游記尋幽攬勝乃發抒其感憤  
抑鬱之情於山石花木之間而其文章之妙當別論  
也是篇神清氣爽獨得天趣肖柳文非柳志耳

何國琛

病中述病記

余少時偶病壯年無病至中年則多病何也或曰病之來也或少年先天不足或壯年斷喪元精或中年勞傷過度皆病之根苗也余曰余之生也在道光癸未春次年冬生五弟吾母連年兩胎不能兼乳亦不雇乳母食余餅餌隨先祖母以居撫育之顧復之無疴瘠狀四歲上學受先祖訓教余識字尚能記憶授四子書讀之七歲夏間隨先祖母至厨下遭湯火厄自胸至腹如蟬蛻之脫病甚危險過一月始愈秋杪忽發二瘰於胸之左

右乳下急不能治幸遇外科友材先生一治卽愈病愈後授以十三經至十一歲讀畢頗能解識數年間無一病者此少時先天之足於無病中而偶一病也追成人後先袒父母春秋高余自周晬隨侍朝夕不離先祖愛蘭蕙羅列堂前芬芳競秀其間開九辨蘭者一開並蒂蘭者二陳鷺峯孝廉以詩紀瑞道光壬寅秋初蘭英馥郁先祖下階砌采之失足仆地左股幾折延醫治兩月餘稍瘥然年逾八旬精血虧耗余年力壯室以內扶持而走室以外肩負而行如是者七載不知倦亦不知勞



也十九歲完姻後仍侍先祖父母側或遇童子試試畢  
卽歸離邑三十里近者一日至離郡一百二十里遠者  
亦一日至或曰急何如此也余曰家有祖父母老矣三  
日不見則哭哭則飲食不甘余一回家則欣欣然色喜  
此蓋愛孫之情勝於愛子余何敢濡滯也當此盛年終  
不知徒行之苦十餘年間聞人有病輒笑之凡遇風寒  
暑熱視若無事究不知何者為醫之良何者辨藥之性  
也此壯年託庇於重闈之側而無病也迨三十後咸豐  
乙卯夏赴都就署正職冬間旋南次年春又赴都改官

員外郎分兵部主選司兼庫司事總理者賈筠堂相國  
滿尚書全公小汀漢尚書朱公桐軒繼之者陳公子鶴  
垂睞有加余亦竭力從公未嘗請一日假公暇凡朋友  
婚喪之事知無不為為無不當且拮据之家設法代籌  
無不為之盡禮凡此為人謀者不遺餘力十年庚申夏  
適遭傷寒症危甚舒君少懷以醫名與余同居服白虎  
湯遂愈愈即出門自負身壯力強未能調養竟為暑氣  
所侵病又作仍服舒君藥越兩月愈得詩若干首自此  
非少壯之年比矣同治二年五月聞施太夫人訃秋仲

回籍守制航海赴滬因烽火未靖紆道遲延次年春抵家先謁母葬所擗踊呼天百身莫贖遠離吾母忽忽十年詩曰欲報之德昊天罔極余心滋愧余恨何日息乎抵家晤昆弟子姪幼者易而為壯矣壯者易而為老矣長房家道素裕良田千畝前之席豐履厚者今則倉箱告匱矣季房糾糾武夫兄弟三人前之衝鋒禦敵者今則為國捐軀矣且有同胞手足鳩形鵠面日不聊生一望見之淚如雨下余召之起居與共衣食與同回憶十年前榮枯得喪其傷心為何如耶由是因心傷而生憂

患因憂患而成疾病卧床一月精神委頓適同族堂弟  
集梧來善岐黃術請治之病乃瘳越數日余散步荒郊  
忽接一書直敘胞六弟鳳岡銜名亂時被賊裹脅賊冀  
其降不屈餓死於昌化之白牛鎮死後賊義之為之藁  
葬書其里居姓氏於牆壁余曰噫異哉此誰氏子之書  
也書內隱其名字祇云公具而已豈非天使之歟抑六  
弟貞魂毅魄待余東歸冥冥中使之然歟遂命甥樓錫  
蕃族弟思桁赴昌化縣之白牛鎮與書中符合檢收遺  
骨而還余率其妻樓氏子宗憲等葬於柏石山之南並

卹其家以慰之然亂離之後老成徂謝故舊凋零居者處者言者行者見之無一是責之不知羞似未可一日居也余與妻妾言曰吾欲遨遊四方買一葉扁舟攜一筆一硯一書一劍泛三江浮五湖朝友麋鹿夕伴樵漁凡遇佳山水前人之游歷而欣賞者余儗之前人之足跡所未經者余至焉一一記之庶幾廣吾見聞擴吾知識歟次年之婺之杭之皖四月晤何小宋方伯及李恕皆陳心泉吳竹莊諸公詩酒往還殆無虛日暇則游龍眠之山掬皖江之水登迎江寺之塔謁余忠宣之墓墓

前築土為城防兵在焉王峯臣軍門統之也七月赴南陵收先叔父遺骸先叔父因二子領兵守甯國一隅赴營就養病歿於南陵其三子鳳雛殉難於江西景德鎮次子鳳鳴調守台州中礮陣亡於是先叔父之骨未歸矣余至南陵徧尋不得余焚香告天苟不得先叔父之骨誓不生還并作文以祭告於山靈忽遇老嫗言之鑿鑿遂得遺骨以歸是時也兵災甫息徧地荒蕪枯骨累累不知凡幾余覓土人檢之約數百棺購良地一區為之合厝並市良田四十餘畝以所入租課為清明中元

冬至祭埽之資並由南陵縣立案以垂久遠八月朔回  
皖省得病甚重請喻君朵庵醫之用地黃湯何李兩公  
見病勢危篤未能決陳公心泉一言定之遂服喻君方  
藥兩月餘始克復元病後何丈雲咳告余曰汝病誠重  
吾知其不死也汝赴南陵為汝叔父檢遺骨地方蹂躪  
血腥污穢汝受一時瘴氣且汝恩及孤鬼買山以葬之  
以產以祭之先親親後仁民此義行也汝果死無天理  
也吾故決之曰不死也且享大年也時在南陵有文有  
記在皖有病中口占詩及贈友諸作嗚呼吾年甫逾四

十而頽唐至此尚何言哉尚何言哉五年夏由皖赴鄂  
見曾沅浦宮保初次進謁素不相識余將泛洞庭之波  
登峨岷之峯行有日矣忽檄辦全省釐務次年兼理書  
局身體猶健黽勉趨公未敢稍懈以報知己也三四年  
間竟無一病去秋七月感冒旬餘請假醫治服喻君方  
藥用表散以解外邪半月就痊病中得感懷詩三百首  
今年閏月耳鳴口醎踰數日舌麻手顫而足亦如手之  
狀余曰輕則風重則癰矣請劉子卓然治之用大補劑  
劉子曰耳係於腎鳴則腎虧也口之味醎火虧水泛也



舌為心之苗其麻者真陽不足也手足並顫由真陽不足陽氣外浮是以為之搖動也非桂附薑芪不可連日服之病去其半惟願兀坐一室默息無事始覺泰然舉凡門以外街巷詬詈聲門以內兒孩啼哭聲一入於耳必察其由我心愈勞我勞愈憊是以彭子有四箴之誠劉子有養身之論也余於病中而得一迷夢記嚴師畏友記及冬至雜感諸詩嗟乎余年未五十而朽敗如此其何以答君上之遇報父母之恩酬知己之知乎或曰病之來也如風雨之驟至病之去也如羽毛之微脫君

其閉戶潛修如學者然蒲團靜坐如參禪然日養一日  
飲食先之藥餌佐之內病漸除外病不作非一年半載  
之久不為功余曰噫攝兩局事已有年矣一則權算宜  
勤也不勤則滋弊一則考證宜確也不確則貽羞余苟  
惟命是聽將廢公而素餐乎非吾之所願也將告退而  
養身乎吾其何以餬口也或者唯唯而退余竊自嘆中  
年之人不如少年又不及壯年過此以後鬚髮將白筋  
骨漸衰其將何以支持耶以視夫徐老海年彭老漁帆  
何老白英或長二三十歲或長十餘歲龐眉皓首松柏

其身而芝蘭其性者其相去奚啻霄壤耶余羨之慕之不禁振筆疾書而自作病原之記然自今始未識能步趨於三老之後塵否也

大作振筆疾書不加雕飾而文情斐亶篇法謹嚴洵為才大心細病中而猶能辦此精神之完固可知然病中而猶思辦此則精神之消耗亦可知也慕君之美還以為箴

郭遠堂中丞

一篇洋洋灑灑二千三百餘言豁澗紆回峯巒起伏令讀者如遊名山竟日流覽不厭其多敘述處尤能

首尾相聯在在應擊文壇之常山蛇陣也

何國琛

地負海涵雲謫波詭讀之令人疏瀹五藏澡雪精神  
君之獲康寧而臻上壽也卽於此文卜之

張炳堃

一氣揮灑中卻有千回百折如水之赴壑如雲之在  
霄具此文心靈動極矣那得不病然有此文筆舒暢  
極矣那復有病枚生之七發陳記室之檄杜拾遺之  
詩猶可愈他人之病而況仙丹聖藥自在君身復何  
病之不愈耶而今而後二豎潛遁六氣不侵劉子卓  
然難矜其功鄙人且當易箴而進頌矣

彭崧毓

嚴師畏友記

余讀陸放翁跋王深書簡云此書朝夕觀之使人若居嚴師畏友之間不敢萌一毫不善意余向疑之夫師友同居聚處和易近人非若父兄之教子弟也何嚴之有何畏之有今余於病時而得一嚴師焉彭子漁帆也得一畏友焉劉子卓然也何言之曩日彭子來吾寓吾適舌麻手顫坐談少頃視余病加劇遂辭去余勉強送屏門外循牆而走高者不知其為階也下者不知其為砌也僕從扶入頭昏目眩舉家皆驚余亦不知其為坐也

卧也余告之曰吾病也輕則風重則癱矣俄而何公白  
英至俄而喻君朵庵至診脉踰時因寸關閉塞未能立  
決次日遣介渡江延請劉子卓然何公又至商酌再三  
服補劑藥傍晚彭子忽投橫幅一紙卧而讀之首曰惜  
智箴蓋謂智者非愚善用其智愚而用智終成為愚勸  
吾惜之是愚中之智也次曰節勞箴勞而有益始非虛  
勞勞而無益何必徒勞勸吾節之是勞中之益也次曰  
懲忿箴忿而知懲剛因柔克忿不知懲躁由暴生勸吾  
懲之是釋躁之方也次曰窒欲箴少年之欲動於血氣

中年之欲牽於利名勸吾室之是延年之術也凡斯四箴交疎者不敢言見淺者不能言今彭子勤勤焉懇懇焉且曰為我養身之助也是君子愛人以德之義也蓋不醫以藥餌而醫以文字者吾當以嚴師事之者其一也劉子卓然善議論工書法古文詩歌洋洋灑灑下筆數千言倚馬可待而於岐黃之術為尤精生平善病日讀醫書其神明而得力者惟張景岳黃坤載二家己巳歲張君鹿仙病久延醫者屢矣猶卧病在床余舉劉子治之服大補劑精神頓健日勝一日此其驗也余今病

或曰用通散以開痰氣也或曰用滋潤以益肺氣也劉  
子曰皆非也君之病吾知之深君之性吾知之真也去  
秋君偶感冒屬予診脉恐君有一旦卒倒之症以君真  
陽微乎其微外象有餘中實不足所恃者每日健飯胃  
陽較勝遇事皆能支持而不知生命之根已剝於下矣  
欲培元氣非茯苓桂附不為功然而茯苓桂附草木也  
君其惜精神乎勿謂精神有餘也君其節勞頓乎勿謂  
勞頓無傷也君其慎起居乎勿謂起居可率爾也靜養  
者此心保衛者此身此其權操之在己非醫術之所能



知也此蓋醫以藥餌而又醫以道義者吾當以畏友事之者其一也之二子者皆楚人也余與彭子交不過數年耳彭子醫我以文字也言言藥石不啻夏楚之施也余與劉子交不過論醫耳劉子之醫我以藥餌也語語規勸遠勝桃李之投也彭不知醫而與劉子之醫合劉祇言醫而與彭子之箴同吾故合記之曰彭子漁帆吾之嚴師也劉子卓然吾之畏友也

語語從性情中流出朋友所以居五倫之一也讀之益增友誼之重余嘗有幽憂之疾退而閒居不能治

也繼自今當以兩君之所以治君者自治然則如兩君者卽謂余之嚴師畏友也亦宜

張炳堃

敘次曉暢沈著而一種古宕之氣直逼坡公真不可及彭公之箴如子產之語叔向劉子之論如醫和之對晉侯君兩受之而深佩之賢於晉君臣多矣奚病之有

何國琛

言無餘意筆無溢字肫肫藹藹讀之如春風被人沁入肌骨至其能受盡言不藏人善匪特工於行文直勇於進道矣

張凱嵩

記夢示宗廉宗彥兩兒

庚午十一月朔冬至夜夢見汝母於曠野之間有牆高數仞余循牆而走汝母隨吾後余曰噫胡為乎來哉汝母生於梓鄉自幼至長外父母愛之如掌上珠年二十一歸余家事上接下人無間言咸豐乙卯余宦游京師踰二年汝母攜次子一女來汝與姊妹四人在家依祖母以居抵京未兩月而汝母卒嗚呼痛哉余曩時孑然一身無親族以襄後事衣衾棺槨竭力摒擋迨殯殮成禮舁柩旋南歸葬於善兒干山之陽汝母亦可瞑目矣

乎今見汝母裙布荆釵非盛服也踽踽獨行無伴侶也禮曰女子居內是生時居之至死則葬於穴宜安之母外出也今自曠野見之隨吾後而默無一言也噫胡為乎來哉兒泣訴曰明日為先母生辰且今年五十因兒輩隨侍膝下不遠千里而來也余漫應之曰汝母生汝兄弟二人姊妹四人在家者尚有一姊兩妹我聞俗語云婦人愛女之心勝於愛子何汝母之與俗異也兒再泣而訴曰有父在也且三妹將配也余曰汝母之來非無因也汝召僧侶禮懺潔治肴核果脯冥寶之屬設道

場而追祭焉可也汝妹之配於許子也是本月十一日  
服飾奩具不豐不儉汝母在不能如此皆汝後母之力  
也又何異於親生之母乎此汝母可以無牽罣也嗟乎  
女未嫁從父已嫁從夫今汝母死已十四年而墓木拱  
矣猶徘徊依戀而不能離者何其誼之篤情之摯也豈  
死後猶有從夫之說歟抑生前未得康居故不遠千里  
而來以受今日之馨香歟然吾不夢見於寢室之內而  
夢見於曠野之間此余所傷心焉而莫解者也嗚呼汝  
之母胡為乎來哉

夢是真夢情是真情遂成此一則真文讀之令人益  
增伉儷之重

何國琛

夢由心生非無端之感召也此境非情深人不有此  
味非過來人不知振觸予懷信為真實文字

彭崧毓

似幻實真世人多於真作幻顧安得真耶

林壽圖

重修漢陽伯牙臺記

伯牙臺在漢陽大別山之尾一名琴臺一名碎琴山相傳為伯牙鼓琴之處其臺創建之初年月均不可攷溯自咸豐癸丑被粵賊蹂躪臺燬無存尚留遺址一區余自丙寅游鄂公暇渡江訪前朝勝跡登晴川之閣泛鸚鵡之洲出城西門有長隄半里許有客告余曰隄之東有月湖古有伯牙臺在焉面臨一碧澄波千尺曩時游觀者登臺閒眺飛鳥翔於上游魚泳於下臺之西有梅子山當隆冬時葩萼萬樹清芬撲人皆為斯臺之助其

最可寶者臺之牆陰有石匾臺之東西壁有石屏八扇  
上刻嘉慶朝宋芷灣太史題琴臺詩書者忘其姓氏時  
厯四朝迄今無一存者噫滄桑之感可勝言哉己巳春  
余修會垣正覺寺內建碑亭二座凡殘碑斷碣羅而致  
之於壁辛未夏晤嚴湘生太守余告以府署中有碑石  
若干塊置諸院落盡見貽以萃於一方乎翼日湘生飭  
役肩諸寺中余徧稽之內有琴臺石匾一詩石四惜其  
不全今年春林子鶴大令由大冶調署漢陽撫綏之暇  
欲重構斯臺因事煩未能躬督其事延潘椒坡明府量



度土木諏吉而重新之將藏工子鶴告余曰當斯臺未  
修時已獲臺中詩石四塊合正覺寺之所先得者斯石  
已全更有一區欲假歸於臺以仍其舊余曰善哉廢者  
能興闕者復完是守土者之責也非賢令尹不能辦也  
伯牙有知不識千載後復遇知音者之有君也余何敢  
以不文辭是為記

韻事韻文並足千古

張炳堃

鍾子期後一時乃有兩知音伯牙有知琴可不碎矣

彭崧毓

凌碎斷續如不經意出之胸次洒然筆力峭絕此等  
意境鈍根人躁心人那從問津耶

張凱嵩

重修鄂垣正覺寺碑記

鄂城東北隅正覺寺明崇禎七年敕建為省會四大寺之一至我朝咸豐元年燬於寇九年官相國督是邦出白金三千五百兩重修大殿後殿各三楹未踰年大風傾圮閱今十稔瓦礫堆積如山阜余於丙寅夏游鄂僑寓寺之西偏越歲適奉各直省創設書局之旨時署楚督者為合肥李小荃中丞撫楚者為湘鄉曾沅浦宮保以余好藏書命承乏其事即假寺之隙地構矮屋數十間為手民刊刻之所次年三月復與張鹿仙觀察

同督校讐由是日夕往來於寺中見鐵佛二尊巋然於  
荒榛蔓草間雨蝕風侵心輒耿耿不能釋今年春過芷  
舫何都轉而請曰寺之廢也久矣欲重興之君能為之  
倡乎芷舫欣然輸百金余商諸何小宋方伯及各官紳  
量度土木則見山門外照牆臨街高三丈餘寬四丈四  
尺厚四尺上銜石龍崛然壁立前明物也經二百三十  
餘年獨不磨滅者殆呵護以有成也於是涓吉鳩工繩  
其規制頭門三間改為天王殿殿外餘址建鐘鼓樓樓  
前新添山門東西各構瓦屋十二間出貨市廛為寺香

火資門以內則官書局三楹東廂十餘間為寺僧住錫所廂外有院直接一牆署曰妙境莊嚴牆內花廳兩楹旁各翼以室一曰東壁圖書一曰西園翰墨外種葡萄雙株清陰滿架以禦炎暑其上有亭曰印心亭亭之東有小苑疊石為山植以梧桐冬青蕉竹之屬其上則大雄寶殿在焉殿五楹高三丈一尺寬八丈三尺深三丈八尺東西兩偏建樓以藏書曰東書樓西書樓殿後有閣曰聽經閣為游觀憩息之所閣之東蔽以籬望之窈然而深蔚然而秀者則小園也園之中有莎臺蔣以天

竺海棠碧桃丹桂又有方池水碧一渠新荷掩映對之  
不覺其塵氛盡滌也池之南植梅數本池之東楊柳十  
株自東迤北有碑亭二座古碑新碑並峙於其中其他  
斷碣殘石之遺留者悉羅而嵌諸壁閣之西為藏書樓  
五楹閣後翠柏二株其歲寒後彫者乎界以圍牆迴環  
如帶長八丈餘額曰最上乘處牆之後有大院左右週  
以矮屋手民於茲從事焉院中有梧有柏皆余手植之  
至於濃陰篩月直榦參天十年樹木何如百年樹人乎  
趨而上後殿三楹額曰般若堂高二丈九尺寬四丈二

尺深三丈八尺殿後角房二圍以高牆牆外餘基有出租於民居者各泐石誌之以清寺址嗟乎時事之變遷物類之成敗殆有天焉天之將廢華屋幻為邱墟天之將興蒿萊易而廣廈如斯寺也當有明時拓基創造閱二百餘年而燬於寇官相國重建未逾歲而大風摧之以余無端而來鄂無端而董書局無端而感其廢之當興也遂不數月而成之豈非天哉至能復其舊觀與否過是寺者當有以諒余已是役也計費白金二千五百餘兩經始於三月二十一日告成於十一月初十日佛

像二尊前立後坐仍其舊而新之大殿後增觀世音像  
配佛也後殿東西兩楹左祀蒼后右祀文昌崇儒教也  
亦識斯舉之有緣起也其佐余董匠事者楊彝庚李榮  
恩應成祖三少尹也招僧人蓮衣為住持蓮衣楚產也  
舊為杭州靈芝寺詩僧今年七十有三矣倘異日有能  
充擴宏規俾香火綿綿而不絕則又廢興絕續之可知  
而不可知者矣是為記

重脩古寺而不撫拾釋氏語移置書局而不用吾儒  
頭巾廊落語手眼極高中間布置點綴羅羅清疎步



步引人入勝結到天人廢興化筆墨為煙雲古文神境也何國琛

記事文最難詳而不煩疎而不漏自照牆起以至寺後餘地敘次井然如一幅畫圖湧現紙上點綴處如霞客游記感喟處如蘭亭序文斯舉不凡斯文亦當不朽彭崧毓

以胸中邱壑為紙上煙雲是能於一彈指頃間幻出金銀樓臺者才人學人一齊頰首張炳堃

雲翻波折自然成文想見度地庀材之先已有腹稿

故能指揮如意布置井然洵此道中之老斲輪也張  
凱嵩

運斤成風具大手段其精緻處尤徵意匠經營林壽  
圖

添修正覺寺書樓碑記

同治丁卯冬奉 詔刊刻經籍大府檄余董其事設局於正覺寺初建瓦屋數十間以棲手民己巳夏募金二千餘兩重修大殿後殿聽經閣等處余作記已勒諸石第念設局日久桀板日多欲建樓為度弃所以費不貲屢議屢止今年春仲成資治通鑑冬 欽定七經工竣梨棗之積幾於充棟乃力請上游添造書樓四所於後殿之左右猶兩翼然樓以上深各三丈凡經部之版悉藏焉樓以下左曰方丈右曰經閣其前隙地為院落雜

植海棠芭蕉丹桂天竺之屬香可掬陰可篩也直殿之中為四見亭亭前為川堂與聽經閣接外繞以欄上嵌疏櫺招風於夏佇月於秋致足樂也川堂之東西復構樓各五楹而子史各集之板悉藏焉廊外碧梧翠柏掩映蔽虧安硯其中研朱滴露塵氛為之一埽方丈經閣之前以及川堂之左右樓下屋數所為寮房禪侶之所棲止也後殿北為小圃可時時蔬作清供環以矮屋二十餘間樹楊柳數十株庖湑園園之所畢具焉是役也計費貨泉三千八百緡同謀興修者張滄山方伯鹿仙

都轉勸其事者張日焜應成祖兩少尹主斯寺者武昌  
僧曉岱其工始於十月六日訖於冬月二十有八日余  
每日聞雞三號攬衣起呼鑿湯畢卽來寺與木石之工  
伍指揮聲呵斥聲與邪許聲相答至烏沈兔升始返寓  
而息旁觀者齊姍笑之以為是殆結香火緣者也不然  
則求福田利益者也又不然則彼法有靈而象教之不  
墜也然而皆非余心也余之始游鄂也無心而來繼之  
董書局也亦無心而至因書局而一新殿宇且復修之  
皆事之適然而不得不然余何容心於其間哉後之游

者可以亮余志矣是為記

奪胎於醉翁亭記而不襲其貌斯為神似末段靈心  
四映如聽生公說法

張炳堃

局度閒雅議論明通雖是記事文字却可作後來一  
大故實可傳可誦

彭崧毓

退補齋文存目錄

卷七

永康胡鳳丹月樵

行略

贈通奉大夫曾祖考臨川公暨曾祖妣王太夫人

行略

贈通奉大夫先祖考甬山公暨祖妣李太夫人行

略

先大夫雅堂公行略 先妣施太淑人行略

封武功將軍先叔父春圃公行略

武功將軍紫庭從弟行略

武義都尉藜庭從弟行略

修職郎鄞縣訓導桐村六弟行略

掖庭從弟行略  
烈婦盧安人行略

邑庠生虞卿七弟暨弟婦王氏行略



贈通奉大夫曾祖考臨川公暨曾祖妣王太夫人  
行畧

曾祖考諱友怡字日章號臨川以曾孫鳳丹貴贈中議  
大夫晉贈通奉大夫曾祖妣王氏贈太淑人晉贈太夫  
人曾祖考於書無所不讀漉液融根嶷嶷樹立顧才豐  
而命嗇數不得志於有司俯仰田園泊如也援例入成  
均棄舉子業肆力於根柢之學性和而介持已接物有  
古人風而內行尤敦人言無間其處鄉黨也善必勸惡  
必懲遇紛爭一言遂釋里有穿窬者痛懲之不少假借

已過卽不復記憶人稱為忠厚長者好施與見義必為  
凡修橋梁施棉粥諸善事無不量力而行為里鄰倡族  
有祠年久傾圯慨然獨捐貲建寢室五楹堂宇門樓各  
五楹翼以東西兩廂凡二十餘間規模煥然至今奉祀  
者咸賴之家有異母弟二分爨時以膏腴之田讓之曰  
吾齒未老猶能勉力經營弟等年少未諳勤儉非沃產  
恐無以自給也方高祖之歿也曾祖考自喪至葬靡不  
盡禮費白金千兩有奇皆一身任之事畢謂兩弟曰生  
財以義用財亦以義吾性儉於義當為無憾也況罔極

之恩豈區區者所能報哉曾祖妣王太夫人有同德內  
政肅然且明大義凡曾祖考諸善行悉贊成之生子二  
伯祖諱鍾宣祖酉山公諱南枝其次也附貢生贈中議  
大夫晉贈通奉大夫女二長適施次適應孫五諱仁柱  
仁梯鳳丹堂伯父也諱仁模附貢生贈文林郎鳳丹伯  
父也先大夫雅堂公諱仁楷太學生贈中議大夫晉贈  
通奉大夫崇祀鄉賢祠諱仁柳太學生贈武功將軍鳳  
丹叔父也曾孫十四鳳林封通奉大夫布理問銜安徽  
候補巡檢署含山縣巡檢太湖縣典史鳳翔道光丙午

科舉人繼昌郡庠生鳳儀道光丁酉科舉人思醇封武  
畧騎尉繼勳咸豐壬子副貢生鳳丹附貢生鹽運使銜  
湖北補用道鳳標邑武生杭協營千總鳳洲處士鳳鳴  
御前侍衛副將銜補用參將戴花翎鳳岡廩貢生鄞縣  
訓導鳳雛邑武生補用游擊戴花翎鳳韶邑庠生鳳恩  
五品藍翎元孫二十九曾祖考生於雍正三年乙巳十  
二月初三日卒於乾隆五十三年戊申二月二十六日  
曾祖妣生於雍正二年甲辰正月二十二日卒於乾隆  
五十二年丁未七月初三日享年均六十有四鳳丹生

也晚於先世行誼不能盡悉謹就夙所聞於我祖我父  
者書之家乘俾後嗣有觀法焉

此同治八年在楚時敬述

自記

不遺不濫一掃近世夸誕之習信可傳之無窮

張炳堃

簡潔不支氣極疏宕

張凱嵩

贈通奉大夫先祖考酉山公暨祖妣李太夫人行  
畧

先祖考諱南枝字希彭號酉山附貢生 覃恩上壽授  
徵仕郎以孫鳳丹貴贈中議大夫晉贈通奉大夫先祖  
妣李氏贈太淑人晉贈太夫人方祖父母之逝也鳳丹  
年已逾冠憶自幼侍側者二十四年於行誼知之最悉  
我祖嘗詔孫等而訓之曰學必體諸身心而詞章其末  
也行必肇於庭闈而廟廊其後也吾幼時昕夕佔畢僅  
博一衿詞章無足算已廊廟何敢期也惟身心之間庭

聞之際則自少而壯而老俛焉日有孳孳一息不敢少  
懈耳爾祖母家本素封于歸後勤儉持躬同茹艱苦且  
能甘旨以進公姑凡吾所欲行善舉或力有不給必脫  
簪珥以贊成之今老矣是所望於善繼吾志者鳳丹謹  
識之不敢忘我祖好讀書卓犖有特識少時專習詩書  
兩經故所造較他經為尤邃應童子試以白菊花賦見  
賞學使者阮文達公拔取入邑庠為一時之雋其詞章  
不屑屑於刻畫字句而藻采紛披古香古色引用故實  
有為博雅士所不知者性倣儻有大志韋布家居隱然

以扶翼世教為己任每談史至忠孝節義事輒若置身  
其間津津無倦色及其馳騁古今辭理貫串若聚米量  
沙燭照而龜灼所規畫常在數十百年外惜也有廊廟  
之才無特達之遇五躋秋闈僅援例貢成均良可慨也  
我祖父母之事我曾祖父母也以孝著其事我伯祖也  
以悌聞自仁率親尤惓惓於本支之愛祖墓有傾圯者  
悉遷葬之曰吾非惑於世俗報應之說但求心安而已  
處鄉黨惟謹尤善獎掖後進懇摯之懷見於辭色所成  
就甚多平生取義若嗜慾稱貸者常塞戶限雖倉猝必



有以應嘉慶二十五年蛟水暴發田里陸沈我祖於桃  
溪畔倡修隄防以障之至今水不為患道光十四年歲  
大旱我祖指囷數百石以賑貧乏者多賴以存金衢嚴  
道德觀察倣古者旌閭之法手書誼篤桑梓匾額榜於  
聖門族黨榮之其他懿德不勝俚指且又多隱行其善  
欲宣之而無從也庶幾哉身心之間庭闡之際我祖兩  
無遺憾矣敢不撫膺所知以昭茲來許乎先祖妣李太  
夫人性慈和勤於治生敦善行不怠與先祖相敬如賓  
終其身無稍替一日先祖謂祖妣曰穀同室死同穴我

與若預營生壙可乎祖妣笑而頷之蓋曠達有如此者  
其地在大井頭之隴卽今安葬處也生子三長仁模附  
貢生鳳丹伯父也以胞姪鳳岡官鄞縣訓導贈修職郎  
以鳳丹官貤請封典晉贈通奉大夫先大夫諱仁楷太  
學生其次也贈中議大夫晉贈通奉大夫崇祀鄉賢祠  
三仁柳太學生鳳丹叔父也封武功將軍女三長適州  
同銜李公梅次適太學生童公秉衡三適太學生王公  
永芳孫十三鳳林封通奉大夫布理問銜安徽候補巡  
檢署含山縣巡檢太湖縣典史鳳翽道光丙午科舉人

繼昌郡庠生鳳儀道光丁酉科舉人繼勳咸豐壬子副貢生鳳丹附貢生鹽運使銜湖北補用道前兵部武選司員外郎鳳標邑武生杭協營千總鳳洲處士鳳鳴道光己酉科武舉咸豐壬子科進士癸丑御前侍衛副將銜補用參將戴花翎鳳岡廩貢生鄞縣訓導鳳雛邑武生補用游擊戴花翎鳳韶邑庠生鳳恩五品藍翎孫女七曾孫二十五宗邦太學生宗湄郡庠生宗卿宗炤太學生宗廉邑庠生候選知縣宗器邑庠生宗俊廩膳生宗庚宗藩宗彝宗蘇均太學生宗彥貢生候選知縣宗

韓宗訓宗偉宗富宗鐸宗褚宗鼎宗壽宗伊宗呂宗荆  
宗周宗楚曾孫女二十八元孫八元孫女五先祖生於  
乾隆二十六年辛巳十二月二十日卒於道光二十八  
年戊申六月初四日享壽八十有八先祖妣李太夫人  
生於乾隆二十六年辛巳十一月十二日卒於道光二  
十五年乙巳四月二十三日享壽八十有五嗚呼自先  
祖父母歿後至今二十有一年想像儀容如夢如昨回  
憶曩時未乞誌銘以藏諸壙心甚歉然伏求名公巨卿  
寵錫瓊瑶勒諸碑石則世世子孫感且不朽

此同治八年在楚時敬述

自記

字字紀實而布勒分明始終條貫曾南豐所謂使死者無有所憾生者得致其嚴此文有焉

張炳堃

入手處一氣貫注取徑極佳以後紀實之言纖穠合度文境至斯有如雲止風行全乎天然之妙

張凱嵩

不蔓不支有文有質

林壽圖

先大夫雅堂公行畧

先大夫諱仁楷字良直號雅堂浙江永康人世居溪岸  
距城三十里黃普山下面臨桃溪始遷祖與權公宋咸  
瀉十年甲戌王龍澤榜進士曾祖霞岑公諱守功職貢  
生例授修職郎方正自守閭里尊之曾祖妣應氏例贈  
孺人祖臨川公諱友怡國學生贈修職郎輕財重義不  
苟然諾所與皆一時賢士祖妣王氏贈孺人考酉山公  
諱南枝附貢生 覃恩上壽授徵仕郎贈奉直大夫晉  
贈奉政大夫兵部員外郎加二級秉性謙退與物無忤

然見義必為不計利害乾隆歲丁巳里有奸猾獲送長吏一鄉帖然道光歲丙申出粟賑飢觀察德公褒以誼篤桑梓匾額妣李氏贈宜人晉贈恭人生二子先大夫其次也先伯父諱仁模附貢生授修職郎晉贈文林郎直隸州州判庶祖妣周氏贈宜人晉贈恭人生一子叔父名仁柳國學生封宣武都尉晉武功將軍御前侍衛加一級先大夫天性孝友幼嗜讀書晝夜不釋卷年十四應童子試卽矯然出衆迨弱冠受業於本邑學師周嘉棟先生郡學師胡樹本先生學日益富雖屢試屢蹶

不忍捨去道光歲癸未兄弟始析居督持家政猶孜孜  
習舉業歲癸巳以家口日衆建屋七十餘楹陳明府屏  
侯顏曰三新堂歲甲午伯父下世先大夫始投筆不復  
應試遂援例入太學歲乙未為合邑文童獨助卷資既  
而念連年荒歉地瘠民貧負耒棄儒勢不容已因捐已  
田一百四十三畝零輸入公家永為常帑並建義塾一  
所顏曰培文書院司事者得以棲止每歲秋收租穀二  
百餘石遇試變價以酬卷資其試院供給及吏胥工食  
之費咸取足焉督學史公郡守王公邑侯廖公立案定



章程以垂永久邑紳士欲聞之大吏具題請獎例得五品銜先大夫謝曰吾非有為為之也吾行吾心之所安而已卒辭不報後舒自庵刺史許吉齋觀察陳琴齋孝廉沈二溪廣文張少南諸先生各以序文揚其美今年夏先大夫疾已彌留命不孝等曰余生平涉世持家布蔬自樂未嘗取一非義所助卷資惟是農圃之所餘聊補寒畯之不足倘遇凶荒猶虞虧歉汝曹宜再增益公田使後世有盈無絀吾願償吾目瞑矣不孝等遵奉治命擇腴田二十餘畝附入之先後計田一百六十餘畝

計費銀五千兩有奇永邑童試千一百餘人至是彬彬  
日盛益自奮於文學矣先是道光之季年先大夫以連  
遭歲歉近村貧戶逋賦者衆因為代納得免追呼並將  
積欠存糧如數悉繳之且思捐田為赤貧者納賦作經  
久計有志未逮寢疾時猶籌畫再三復命不孝等曰此  
事宜詳慎汝曹有力為之無力不必為也先大夫敦本  
睦族奉祀事惟謹宗祠常例秋分上丁冬至拊主應輸  
分錢若干貧者往往不克成禮先大夫助田數畝為貧  
族上丁入主之費由是昭穆秩如不以貧富分隆殺鄉

鄰無力者日有餼歲有衣嫁娶喪葬皆有贍求觀者至  
門雖夜分與穴迫時必有應或有不平忿爭者排難解  
紛一言輒悟治家嚴肅閨門內冢婦介婦并口中饋分  
勞讓逸子姓問安視膳惕然就矩矱每歲出入盈絀之  
數親為經紀衣食財足其餘則推解不吝不使少留曰  
毋以是為子孫累生平好義急公而又謹守法度未嘗  
以私謁公庭歷數十年如一日也 不孝等沐浴蔭庇方  
懼不能分先大夫之憂成先大夫之志猶幸愛日方長  
康強無恙冀得稍自樹立以慰庭闈暮景詎意今年四

月間偶感傷寒在苒三旬竟至不起是皆不孝等侍奉  
無狀搶地呼天萬死莫贖嗚呼痛哉先大夫生於乾隆  
五十九年甲寅二月十四日子時歿於咸豐四年甲寅  
五月初十日戌時享壽六十有一邑紳士聞之含哀悼  
嘆僉曰士無論窮達而有德者沒世名稱古今之通義  
也唯其當足以慰人之思唯其公足以取信於後世鄉  
曲之評儒林之議亦猶行古之道也今胡君潛德貞曜  
無媿有道若闕而弗彰於胡君無損也其如後死者之  
責何因相與私謚曰惠文先生先大夫娶吾母施氏

誥封宜人

晉封恭人同邑處士美輪公女子男七人

不孝鳳林

太學生娶童氏太學生諱必達公孫女名秉

衡公女

不孝鳳翔

道光丙午科武舉候選衛千總娶馬

氏太學生

名正和公女不孝鳳儀

道光丁酉科武舉候

選衛千總娶呂氏州同名載希公孫女庠生名旌溪公

女

不孝鳳丹

附貢生兵部員外郎加二級娶鄭氏候選

州同

諱

筠公孫女議敘縣丞名咸林公女

不孝鳳標

庠

生卽補營千總娶盧氏布政使理問恒山公孫女庠

生諱錫璋公女

不孝鳳岡

廩貢生卽選儒學訓導娶樓

氏候選都司諱楹公孫女諱啟詠公女不孝鳳業儒

娶王氏附貢生諱大鏞公孫女太學生名永芳公女女

一人適庠生樓名械公子庠生名泰交孫男十人宗邦

太學生娶呂氏庠生諱丹公女宗欽娶章氏廩生名慶

培公女宗庚聘林氏庠生名厚培公女不孝鳳林出宗

賢聘徐氏廩生名汝銓公女宗彥聘仁和王氏候選布

政使理問名應魁公女不孝鳳丹出宗器不孝鳳標出

宗藩不孝鳳儀出宗憲宗訓不孝鳳岡出宗蘇不孝鳳

姻出俱未聘孫女二十人一適太學生樓諱崇恩公子

一適王

名永洙

公子一適庠生樓

名泰交

公子一適太

學生陳

名

公子一適施

名正潤

公子一適施

名紹

禹公子一適庠生呂

名耀丁

公子一適徐

名楫

公子一適施

名友波

公子一適庠生應

名國興

公孫餘俱未字

曾孫一

寶元宗邦

出曾孫女一

嗚呼先大夫積學一生

樂善不倦

名未登仕版而施於一家一鄉一邑者嘉言

懿行可法可傳

不孝

等不克負荷表揚先德若使泯沒

無聞獲戾滋大用敢偷息和淚畧述梗概

苦塊昏迷語

無倫次伏乞當代大人先生錫之銘誅以光泉壤

不孝

無倫次伏乞當代大人先生錫之銘誅以光泉壤

不孝

等不克負荷表揚先德若使泯沒

無聞獲戾滋大用敢偷息和淚畧述梗概

苦塊昏迷語

無倫次伏乞當代大人先生錫之銘誅以光泉壤

不孝

等不克負荷表揚先德若使泯沒

等世世子孫感且不朽

此咸豐四年在籍時敬述

自記

看似瑣瑣屑屑細按之乃見犁然秩然井井有法是  
謂飾而非夸詳而能覈

張炳堃

莊誦是篇具見德門積善餘慶方長無任敬佩文分  
段敘去繩貫鈎連最零碎瑣屑處正是極悲愴淋漓  
處其事其文均堪不朽

張凱嵩

辭極委備而無繁碎之言

林壽圖



先妣施太淑人行畧

吾母封太淑人施氏同邑贈武畧騎尉奐齋公諱美輪之女也幼工女紅寡言笑喜怒不形侍外祖父母側先意承志晝夜無倦容性警敏超悟絕倫外祖父嘗撫吾母嘆曰汝不幸為女子身若男也光大吾宗矣吾必擇積善人家子弟字之年十九歸我先大夫中議公事先祖父母維謹晨夕甘旨必手調以進柔色婉容六十年如一日外祖父早世外祖母楊氏守節撫孤家中落太淑人乃迎養於家事之如事舅姑先大夫年十四應童

子試輒前列顧屢屈於院試每讀書夜分不輟太淑人  
理家政凡米鹽事不以相諮故先大夫得肆力於學先  
大夫偕先伯父宏齋公先叔父春圃公恆游學於外太  
淑人與伯母叔母同居四十餘年和氣充溢門以内無  
詬誶聲性儉約不愛華飾生平不蓄珠玉之珥纖縞之  
衣生不孝等七人顧復擁樹未嘗有乳媪先大夫喜賓  
客太淑人主中饋奉客豐腆而自食粗糲率諸婦躬操  
井臼凡勞瘁之事必身先之不奉佛不茹素每月朔望  
焚香告天歲時祭祀備物明虔無有稍懈歲辛酉二月

十四日太淑人七十壽辰不孝等請置酒奉觴上壽太淑人曰汝等以數百金供一日之用盍以此散給族黨中飢寒不能存活者張樂設宴非吾意也不孝鳳丹官武部屢欲迎養京師太淑人以年老憚於遠涉不果行體素健年踰七十視聽不衰子孫衆多教之必以禮咸豐八年二月粵賊由處州竄陷永康吾家桃谿距城三十里賴鄉人保衛得全十一年四月賊由金華連陷八邑永康復失賊踞縣城四出焚掠厯歲餘賊益熾不孝鳳林等奉太淑人崎嶇遷徙以避之同治元年七月賊

退廬舍被焚幸新居猶在奉太淑人還居甫定而賊復

由武義竄東陽道經吾鄉

不孝鳳林等

倉卒奉太淑人

以出

不孝鳳標

婦盧氏及七弟

鳳韶

七弟婦王氏罵賊

不屈均遇害七弟之子

宗壽

女璧姑

同時殉難太淑人

因是得疾八月還鄉而疾日以篤矣嗚呼自逆賊肆擾

東西寢及兩浙所至屠戮而永康淪陷者再人民塗炭

田卒汙萊吾胡氏子姓捍賊戰死者踵相接壬戌七月

賊衆掩至變起頃刻

鳳韶

夫婦等遂罹其殃太淑人以

驚恐之餘痛念天屬被禍之烈惻愴抑鬱遂以不起嗚

呼以太淑人之慈儉仁厚宜享上壽而乃亂離遭疾以卒此不孝等所以枕戈待旦椎心泣血飲恨而不能已者也吾胡氏以勤儉起家衣食財足先大夫樂善好施乙未歲捐田一百四十餘畝為闔邑文童縣府院試歲科冊費卷資建義塾曰培文書院復捐腴田歲收其租為塾中延師之費先大夫卒太淑人奉遺命捐田二十餘畝以充經費吾宗舊例以秋分上下冬至拊主於祠而輸費以為祭祀之需先大夫嘗捐己田為貧乏者如例代納鄉鄰中有喪葬不克舉者輒出資助之永康下

涇多水患田被冲齧而額糧猶著於籍名曰濫糧逋欠日多追呼者徧野庚戌歲先大夫統計一鄉中奇零小戶有糧無田者獨力代輸如是數年慷慨無德色先大夫疾革顧謂太淑人及不孝等曰代償濫糧益於貧民然恐日久遂為子孫累汝等宜量力為之太淑人泣受命然猶竭力摒擋為貧民代納者二年先大夫好善之誠與太淑人贊助之力吾鄉人士至今感誦不衰云太淑人生於乾隆五十六年辛亥二月十四日子時卒於同治元年壬戌八月十八日亥時享壽七十有二以不

孝鳳翔鳳儀鳳標官 誥封太宜人以不孝鳳丹官遇

覃恩誥封太恭人 累封太淑人子七長不孝鳳林

太學生候選州同娶童氏東衡公女次不孝鳳翔道光

丙午科武舉揀選衛千總娶馬氏太學生名正和公女

次不孝鳳儀道光丁酉科武舉揀選衛千總娶縉雲呂

氏庠生名旌溪公女次不孝鳳丹附貢生候選道前任

知府銜兵部員外郎娶鄭氏議敘縣丞名咸林公女繼

娶宋氏直隸盧龍封奉政大夫諱聲遠公女次不孝鳳

標郡庠生杭協營千總娶盧氏庠生諱錫璋公女次不

孝鳳岡

廩貢生鄧縣訓導娶樓氏諱啟詠公女次不孝

鳳韶

邑庠生娶王氏太學生名永芳公女女一適同邑

庠生樓泰交孫男二十一人宗邦太學生娶呂氏庠生

諱丹長女

宗卿

娶章氏咸豐戊午科舉人名慶培女宗

庚聘林氏庠生名厚培女不孝鳳林出宗蘇宗敬俱幼

讀不孝鳳翔出宗藩業儒不孝鳳儀出宗賢太學生考

取騰錄娶徐氏廩生名汝銓女宗彥業儒聘仁和王氏

候選布政司理問名應魁女不孝鳳丹出宗器不孝鳳

標出宗憲宗訓宗鼎不孝鳳岡出宗壽不孝鳳韶出



女二十九人曾孫三

懷昌宗邦出定昌宗卿出爾昌宗

賢出俱幼曾孫女四俱幼未字

不孝鳳林等在籍親視

含斂不孝鳳丹需次京師聞訃奔喪將歸啟先大夫之

封而合葬焉用和淚濡墨畧述懿行伏乞當代大人先

生錫之銘詞以光泉壤感且不朽

此同治二年在京聞訃時敬述

自記

古今述先德之文首稱廬陵瀧岡阡表惟其用情真

而指事切也此文敷述精當一筆不苟是能得其神

而不襲其貌者敬服敬服

張炳堃

與震川述先妣事畧並傳不朽此猶以質樸勝林壽

圖

封武功將軍先叔父春圃公行畧

先叔父諱仁柳字良能號春圃國學生以子鳳鳴貴封武功將軍世居浙江永康之溪岸先大父酉山公生子三長先伯父宏齋公附貢生贈文林郎次先大夫雅堂公國學生贈中議大夫祖妣李太淑人出三卽春圃公庶祖妣何太恭人出也生而謹厚喜讀書舉步不踰禮法門以內無間言治家以儉布衣疏食泊如也先叔母施氏唐西國學生璇璣公女生子四長鳳洲力學早世次鳳鳴道光己酉科武舉咸豐壬子科進士癸丑科補

行殿試授御前侍衛以軍功賞戴花翎並給協勇巴圖魯儘先補用參將加副將銜三鳳雖郡庠生以軍功游保游擊賞戴花翎四鳳恩在籍辦團禦賊殉難女三均適士族當承平時先叔父三子皆已成立一門雍睦侍奉承歡迨咸豐三年粵逆竄陷金陵東南告警鄉里豪傑皆思投効行間奮身殺賊六年鳳鳴鳳雖隨鄧軍門紹良防守甯國厯著戰功八年先叔父束裝赴甯就視兩子常諭鳳鳴鳳雖曰忠孝不能兩全汝等旣以身許國効力戰場切勿以親老家貧爲念因卽在營就養兼

督其勤惰十年甯郡告急南陵被圍憂念國事焦灼成疾鳳鳴鳳雖方督兵守南陵不克侍湯藥疾增劇以七月二十四日歿於營次鳳鳴等倉卒殯殮權厝北門城外未幾鳳雖赴援江西殉難景德鎮浙撫王壯愍公檄調鳳鳴回浙救援省城道途梗塞轉輾至台州黃巖縣逼賊力戰死鳳恩禦賊於東陽之壬山因寡不敵衆亦被害先叔母施氏因三子相繼陣亡悲痛發病而歿先叔父生於嘉慶十年乙丑八月十九日春秋五十有六娶施氏生於嘉慶五年庚申五月十三日卒於同治元

年壬戌六月二十八日壽六十有三嗚呼痛哉先叔父  
一生謹慎不慕榮名乃獨不顧身家教子忠義卒令三  
子捐軀報國名垂後世以視夫高牙大纛徒知持祿位  
保妻子平時則置疆事於不問一旦聞風鶴警則率先  
奔竄以為民望者其相去奚啻倍蓰哉先叔父遺骸久  
厝南陵余於四年七月躬親檢骨歸葬並為鳳鳴鳳雖  
鳳恩三從弟詮次行畧伏求當代大人先生傳贊以慰  
忠魂而遺子孫焉

此同治四年在皖時敬述

自記

祇紀其實忠烈之氣如生有餘於詞之外者林壽圖  
一門死義歸本教忠立言得體文亦凜凜有生氣可  
以廉頑立懦張炳堃

武功將軍紫庭從弟行畧

從弟諱鳳鳴字岐西號紫庭曾祖臨川公諱友怡國學生妣王氏祖酉山公諱南枝附貢生妣李氏父春圖公國學生以鳳鳴貴封武功將軍母施氏封太夫人有子四紫庭其次也生而岐嶷英偉過人讀書明大義以名節自砥礪時諸昆季多就武因入縣學為武生道光己酉科鄉舉咸豐壬子科進士癸丑補行殿試授御前侍衛賞戴藍翎乾清門行走每休沐時輒從賢士大夫游益勉於學甲寅冬請假回籍省親值東南軍事方興謁



巡撫何公慷慨言兵事甚器重之乙卯春疏留浙江與  
在籍兵部侍郎戴文節公辦理省城團練募勇練卒并  
并有條浙江西界江西北界安徽時江右廣饒之匪勢  
欲與蕪湖賊聯合浙中大吏議以皖南為浙藩籬徽甯  
為浙門戶故不分畛域分兵濟餉力保徽甯六年丙辰  
奏調鄧軍門紹良防守甯國自豫章來浙紫庭赴營謁  
見遂相知遇請同行旋奉巡撫畊雲何公劄募台勇二  
千隨往防所胞弟鳳雛從焉是年十二月克復甯國縣  
城功第一由侍衛授游擊賞換花翎並給協勇巴圖魯

名號七年丁巳分駐南陵歸米鎮軍興朝節制八年戊  
午冬鄧軍門灣沚殉難米鎮軍接統甯防南陵諸軍均  
歸紫庭統領紫庭益奮勉和輯兵民訓練士卒撫卹瘡  
痍誅鋤姦慝數月而人心大定兵威一振雖軍書旁午  
無不悉心擘畫精神貫澈未嘗稍懈九年己未灣沚東  
壩相繼失守甯郡告急南陵被圍紫庭與胞弟鳳雖協  
力守城南陵危而復安時鳳雖已由武生保舉游擊賞  
戴花翎未幾赴援江西殉難景德鎮奏聞 上優加獎  
卹紫庭力守南陵孤軍堵禦 上嘉其勇奉 旨免補

游擊以參將儘先補用並加副將銜十年庚申八月甯  
郡陷南陵四境皆賊外無救援內無儲蓄皖南陳鎮軍  
大富守之紫庭創議謂南陵孤城四面受敵戰不能保  
兵之不敗守不能保城之不失且合城老幼不下數千  
與其坐困危城束手待斃何如退守魯港以待來援遂  
令百姓先出兵勇隨之賊勢蜂擁且戰且走護至魯港  
老弱男女無一失者是年蘇常淪陷賊圍杭郡浙撫王  
壯愍公檄調回籍時衢州金嚴各郡已為賊踞遂由松  
陽繞道縉雲而賊已竄蘭湯諸邑暨陽為赴杭要道時

亦失守乃由壺鎮至台州黃巖縣未踰月而賊虐至帝  
勇力戰中礮殞命時十年十一月十七日事也距生於  
道光七年丁亥八月二十三日年三十有五妻施氏生  
一子名宗富幼殤是時省城旋陷殉難各官無從查報  
克復後台郡紳士始呈請奏卹奉 旨下部議賜卹蔭  
如例

芒寒色正墨瀋淋漓提挈處意境一新尤為尋常履  
齒所不到

張凱嵩

文稱其人質直有體

林壽圖

武義都尉藜庭從弟行畧

從弟諱鳳雖字耀西號藜庭先叔父春圃公第三子也  
貌豐偉力兼數人咸豐癸丑入郡庠為武生永邑武試  
最重技藝未易前列藜庭應郡試取第一其兄紫庭入  
庠時亦第一邑中稱為二難云紫庭掇巍科授侍衛省  
親回籍留辦本省團練凡選募兵勇教演技擊藜庭與  
有力焉丙辰秋巡撫何公劄紫庭隨鄧軍門紹良協守  
甯國藜庭偕往遂同克復甯國縣城保千總儘先補用  
賞戴藍翎踰年偽忠逆李秀成破廣德東壩等處甯國

被圍黎庭請援方至而縣城已陷卽誓士卒奮勇攻撲立復甯城時已由千總捐都司奏保以都司儘先補用並賞換花翎九年三月兵部籤補金華協都司因籍隸本府調補嘉興協都司接奉部劄未赴任旋奉陳鎮大富派帶楚勇一千五百名隨調江西助勦景德鎮賊連破賊壘十餘座聲威大振時賊勢甚熾血戰數日賊愈聚愈多黎庭急思滅賊奮不顧身每戰輒身臨前敵猝中大礮卽時殞命尸骨粉碎無從檢斂死事景德鎮者黎庭為最慘九年二月二十八日事也距生於道光十

二年壬辰二月十三日歿年三十有三藜庭為人謙和  
仁恕兄弟友于而遇事直前絕不退避方其初至景德  
鎮也陳鎮軍喜戰屢捷已擬保游擊儘先補用匝月與  
陳鎮軍同時殉難將士多痛惜之兩江總督曾公將擬  
保升階奏請從優議卹奉 旨照參將例議卹賞給卹  
銀五百兩世襲雲騎尉襲次完時以恩騎尉世襲罔替  
藜庭生一子一女家鄉遭亂妻施氏隨次嫂施氏季弟  
媳王氏挈負奔避未幾子女相繼天逝以季弟子宗伊  
為後

退補齋文存卷七

五

藏板

著墨不多而當時忠義之氣自己湧現毫端何國琛  
悽惻處於一二語傳神林壽圖



修職郎鄞縣訓導桐村六弟行畧

六弟諱鳳岡字綵飛號桐村自幼穎悟誦讀過人年十三已能貫串經義尤喜春秋三傳條分縷析熟精其理年十四應童子試十八歲試於郡冠其曹為張蘭亭太守所激賞次年趙蓉舫宗師按臨金郡與余同入邑庠自後恆肄業省垣敷文書院試輒前列二十歲萬藕舲宗師歲試一等第三補食廩餼性情剛直處鄉里中為人排難解紛折以大義無不樂從者在家課子姪甚嚴教讀數載皆能誘掖以成其材丙辰遵例捐輸議敘分

缺先選訓導十一年冬銓授甯波府鄞縣訓導次年遇  
覃恩以本身封典貤贈先伯父宏齋公贈修職郎伯  
母李氏封太孺人未赴任時與從兄礪溪在籍團練堵  
禦數載自咸豐八年十一年郡邑城相繼陷而永康鄉  
團尚能各保村鎮未盡蹂躪嗣因賊勢益熾力漸不支  
同治元年七月賊四出焚掠弟遂挈眷奔避旋被擄賊  
知弟辦團日久目為大妖又以其能強以偽官矢志不  
屈賊復百計誘之且守之嚴至昌化縣之鄉堡遂堅不  
食數日歿於白牛鎮是年九月事也時年三十有七賊

咸義之壑其屍并書姓氏里居於藁葬之所三年余奉  
諱回里遣甥樓錫蕃族弟思傳尋訪遺骸若有神助竟  
至葬所檢骨以歸重為棺殮葬於柏石之山陽弟生於  
道光六年丙戌十月十一日歿於同治元年癸亥九月  
初七日娶樓氏封孺人生子三宗憲宗訓宗鼎皆幼女  
一適縉雲周氏

只敘遇賊時情狀自足千古斯文傳斯人傳矣何國琛

賊猶知義之文亦能傳之死者可以慰矣

林壽圖

掖庭從弟行畧

從弟諱鳳恩字鎬西號掖庭叔父春圃公第四子也幼喜讀書晝夜攻苦不出戶庭伯兄蓮西早逝仲兄紫庭叔兄藜庭於咸豐六七年間先後赴鄧軍門紹良營協守甯國約掖庭在家侍奉凡可博庭闡歡者無不備至踰年叔父春圃公束裝赴甯未幾歿於營次時藜庭已殉難景德鎮紫庭方督兵力守南陵倉猝殞殮未及扶柩回籍而賊已竄金華永邑疊陷掖庭奉母及諸嫂還避山中旋得仲兄紫庭殉難黃巖之信一慟幾絕義憤

填膺誓欲與兄報警紫庭所部台勇自黃巖敗回者掖  
庭輒招集之得數百人禦賊於東陽殊死戰賊屢進屢  
卻偵知我兵無援復大至卒以衆寡不敵遂戰歿於東  
陽之壬山時年二十有四同治元年十一月二十日事  
也台勇由是潰散而金華境內遂被賊蹂躪無完土矣  
嗚呼兄弟忠義視死如歸不愧古之人哉紫庭蔡庭効  
力行間志決身殲大義宜爾掖庭一書生耳乃痛兩兄  
之死賊一聞寇警收輯散亡出境禦之力欲復仇並保  
全吾永也孤掌難鳴卒以身殉志亦可哀也已掖庭生

於道光十八年戊戌十月十五日妻王氏子二宗文宗  
伊嗣一子為叔兄黎庭後

事親以盡孝道復仇以盡弟道而臣道寓乎其間矣  
三復斯文筆如轆轤神采煥發當為家乘生色

何國琛

紀實語懍懍有生氣總結處老潔無比是真能得古  
文之神髓者

張凱嵩

國難家難情境猶在目前未忍卒讀

林壽圖

烈婦盧安人行畧

安人盧氏邑庠生盧錫璋之女杭協營千總五弟鳳標之元配也幼嫻姆教未嫁時能博父母歡友于兄弟不苟言笑謹守女箴足不踰閭每談節義之事輒慷慨歎歎不能自己其貞烈根於天性然哉迨歸我五弟後宜室宜家克勤克儉井白身操之澣濯身任之事舅姑以孝處妯娌以和相夫無違可謂克盡婦道矣永邑自咸豐十一年再陷羣賊四出焚掠靡有孑遺吾家離城三十里圍練自保賊憤殺傷甚慘安人避賊不及遂投水

死時同治元年七月三日也閱日賊退撈其尸面色如生嗚呼婦女貞烈之性與丈夫忠勇之氣同足千古矣安人生於道光四年甲申正月二十三日歿年三十有九生子一宗器邑庠生女二一適同邑庠生施有波子一適廩生陳定邦子

不事鋪張獨得簡要文氣直逼子長

何國琛

桐城宗派林壽圖



邑庠生虞卿七弟暨弟婦王氏行畧

七弟諱鳳韶字雲飛號虞卿貌清癯天姿敏悟讀書目  
數行下先太淑人生弟時年已五十有一弟行最少愛  
憐特甚慮弟體弱囑其培養精神勿急急以讀書為念  
弟聽受母命恆服滋補湯劑而吟誦之聲仍晝夜不輟  
年十五應童子試卽列前茅十七補邑博士弟子員黌  
序中名譽卓卓皆以大器目之庭闈侍奉能博歡心事  
諸兄如師長以敬以誠一門之內無間言也妻王氏姑  
女也姑僅生一女先祖母李太淑人為弟娶之以聯舊

姻生一子宗壽女一先太淑人年逾古稀見弟成立復見生孫欣喜愉悅尤得老人歡焉咸豐八年粵逆竄東南永邑陷閱兩月而城復十一年金郡失守邑城再陷自是四鄉蹂躪幾遍方賊未至時弟語家人曰吾家人口繁多倘賊至吾鄉猝難奔避宜早為計以避賊鋒吾一介孱弱不耐奔走惟有一死而已元年七月賊至被執罵賊不絕聲賊憤斫之罵益厲遂斫之至死時年二十七歲子宗壽侍父旁不去見賊刃父亦哭罵賊賊并戕之弟生於道光十六年丙申六月十一日歿於同治

元年辛亥七月初三日賊退弟婦王氏挈女回祖見夫  
死子死一慟幾絕誓不再生殯殮後水漿不入口者數  
日形容銷毀至八月十七日午時卒年二十有八生於  
道光十五年乙未七月二十九日歿距夫死剛及兩月  
一女未離襁褓踰日亦殤旣由縣詳請旌卹如例復為  
龕述其概如此嗚呼自吾叔父春圃公以忠義倡其子  
若姪於是先後殉難死節者得弟及弟婦而八人矣論  
者謂節烈之氣萃吾一門近代罕觀為宗族光而以余  
藐茲一身疊遭骨肉慘變痛定思痛傷如之何今余猶

視息人間回念叔父與諸弟輩僅得存諸想像遇諸夢寐執筆論次蓋泣然不知涕之何從也

以上行畧七篇四年游皖時敬記

前半敘述井井後數行情文兼至聲與泪俱古文神境何國琛

不事雕飾自極哀摯

林壽圖